

Assartuussinermi ataatsimut akissaaajaatit annikillisinnissaat, timmisartuussisarnerup akulikillinissaa aamma unammilleqatigiinnerup annertusisinnaanera siunertaralugit Mittarfinnik sanaartorneq pillugu Inatsisartut inatsisissaattut siunnersuummik qinigaaffimmi matumani Naalakkersuisut saqqummiussinissaannik peqquneqarnissaannut Inatsisartut aalajangiiffigisassaattut siunnersuut. Tamanna pissaaq mittarfiit, qulimiguullit mittarfiisa akunnisimaartarfiisalu piusut amerlanerpaamik 19-inut ilaasoqarsinnaasunut mittarfinnut millilernerisigut aamma allilernerisigut.

(Inatsisartuni ilaasortat: Anders Olsen, Siumut, Jens-Erik Kirkegaard, Siumut, Tillie Martinussen, Demokraatit, Ane Hansen, Inuit Ataqatigiit, Kalistat Lund, Inuit Ataqatigiit)

Akissuteqaat

(Ineqarnermut, Sanaartornermut Attaveqaatigiinnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortat Anders Olsen, Jens-Erik Kirkegaard, Tillie Martinussen, Ane Hansen aamma Kalistat Lund aalajangiiffigisassamik siunnersuuteqarneranni qutsavigaakka.

Aallarniutigalugu oqaatigissavara, Naalakkersuisut pingaartimmassuk silaannakkut angallasseriaatsit tamarmiusut ingerlaavartumik ineriartortinneqarnissaat. Mittarfiit pillugit ataatsimoortumik Naalakkersuisut saqqummiussinerini nunatsinni mittarfiit nunat tamalaat, nunat Imarpiup avannaaniittut nunallu immikkoortuisa akornanni mittarfinnut nutaanut ineriartortinneqassapput. Pilersaarutip taassuma piviusunngortinneqarnissaata peqatigisaanik Naalakkersuisut isumaqarput – aalajangiiffigisassatut siunnersuut manna malillugu – nunap sinnerani silaannakkut angallassinermi attaveqaatit ingerlaavartumik naleqqussarneqartariaqartut.

Nunap immikkoortuini mittarfinnik, silaannakkut angallasseriaatsitsinni attaveqaatit sinneri peqatigalugit nunatsinnik pitsaanerusumik ataqatigiissitsisussanik, aammalu tikittartut amerlanerulernissaannut, eqaannerusumik aaqqiinissamut ingerlatsinermullu aningaasartuutit ikinnerulernerinut iluaqutaasunik ineriartortitsinissamik siunnersuuteqartup anguniagaqarneranut Naalakkersuisut isumaqataapput. Mittarfinni ataasiakkaani ingerlatsinermut aningaasartuutit ikinnerulerneru, aammalu mittarfiit ataasiakkaat atortunut atorqeartunut pitsaasunullu naleqqussakkanik ilusiligaanerat naggataatigut aamma bilitsit akikinnerulernerinik, kiffartuussinissamullu isumaqatigiissutinut amerlasuunik aningaasartuuteqarfiusartunut aningaasartuutit ikilinerinik kinguneqartussaapput.

Taamaattumik mittarfiit ilaasa nunap immikkoortuini mittarfinnut, timmisartunik 19-it tikillugit ilaasoqarsinnaasunik sullissisinnaasunut appartinneqarnerat timmisartut akulikinnerusumik tikittarnerannik, aammalu ingerlatsinermut bilitsinullu aningaasartuutunik sipaagaqarnermik, kiisalu atortunik sulisunillu pitsaanerusumik atuilernermik kinguneqarsinnaammat Naalakkersuisut isumaqataapput. Kiisalu qulimiguullit mittarfiisa akunnisimaartarfiisalu nunap immikkoortuani mittarfinnut qaffanneqarnerat amerlasuunik sipaagaqarnermik kinguneqartussaavoq, qulimiguullit ingerlatsinermut amerlasuunik

aningsartuuteqartarmata, taamaalillutillu kiffartuussinissamut isumaqatigiissutinik akisuunik annertuumik pisariaqartitsiviusarlutik.

Taamatut nunap immikkoortuini mittarfinnik ilusiliilluni ineriartortitsinermi timmisartut assigiinngitsut amerlanerusut ikinnerusunik aningsartuuteqarlutik akulikinnerusumillu tikittarlutik sullissisinnaapput. Assersuutigalugu Canadami timmisartuliorfik Viking Air Twin Otter-inik sanaartorluni aallarteqqippoq. Timmisartoq taamaattoq 19-it tikillugit ilaasoqarsinnaavoq, usisinnaassuseqarluarpoq, Kalaallit Nunaata silaata ittumi angalasinnaassuseqarluarpoq, tutsuiginartuuvoq aammalu qulimiguulimmit aserfallatsaalineqarnissamut annikinnerusumik pisariaqartitsisarluuni.

Silaannakkut angallassinermut pilersaarut, maannarpiaq Ineqarnermut, Sanaartornermut Attaveqaqatigiinnermullu Naalakkersuisoqarfimmi inaarsarneqartoq, immikkoortut aappaani nunatsinni nunap immikkoortuini mittarfiit ilusaannik annertusaanissamut allanngortiterinissamullu pilersaarutinik imaqarpoq. Pilersaarut aalajangiiffigisassatut siunnersuummi matumani anguniakkanut naapertuulluinnartoq, taamaattumillu aalajangiiffigisassatut siunnersuummi takorluukkanut Naalakkersuisut isumaqataapput.

Naalakkersuisut siunnersuutigissavaat Silaannakkut angallassinermut pilersaarut aalajangiiffigisassatut siunnersuut naapertorlugu iluarsaateqqinneqassasoq, tamatumalu kingorna immikkoortumut pilersaarut nunatsinni silaannakkut angallassinermi attaveqaatit tamarmiusut ineriartortinneqarnerinut ataatsimoortumik sinaakkusiissaaq. Tamanna tunngavigalugu sanaartornermut inatsisissarpimik suliaqartoqassanngitsoq Naalakkersuisut siunnersuutigissavaat, oqaluttuarisaaneq eqqarsaatigalugu taamaaliortarneq eqarsititsingaatsiartartoq paasineqarsimammat, taamatuttaarlu taamaattumik suliaqarneq anguniakkap naammassinissaanut kinguaattoortitsisinnaasarmat.

Tamanna tunngavigalugu matumuuna Naalakkersuisut allannguutissatut siunnersuummik imaattumik saqqummiussaqrput:

Nunatsinni assartuussinermi ataatsimut aningsartuutit annikillisinnissaat aamma timmisartuussisarnerup akulikillinissaa siunertaralugit, nunap immikkoortuini silaannakkut angallannermut attaveqaatit ataatsimoortut silaannakkut angallassinermut pilersaarummut ilanngunneqarnissaannik qinigaaffimmi matumani Naalakkersuisut saqqummiussinissamut peqquneqarnissaannut Inatsisartut aalajangiiffigisassaattut siunnersuut. Taamaalilluni suliassaqarfimmi immikkoortumut pilersaarummi mittarfiit aamma qulimiguullit mittarfiisa akunnittarfiisalu pioreersut piginnaasaasa millineqarnissaat allineqarnissaallu nunap immikkoortuini tullerriarnermut ilanngunneqassapput.

Taamatut oqaaseqarlunga allannguutissatut siunnersuut Inatsisartuni kajumittumik suliassanngorlugu tunniuppara.